

Utoqqarnut sammititanik siunissami pisortat sanaartortarnissaannut aaqqiissutissamik innersuussisumik Naalakkersuisut kingusinnerpaamik UKA 2017-imi nassuiaammik saqqummiussinissaannik peqquneqarnissaannik Inatsisartuni aalajangiiffigisassatut siunnersuut.

(Inatsisartuni ilaasortaq Ane Hansen, Inuit Ataqatigiit)

Akissuteqaat

(Ineqarnermut, Sanaartornermut Attaveqaqatigiinnermullu Naalakkersuisoq)

Siullermeerneqarnera

Nuna Tamakkerlugu Pilersaarusiarnut Nassuiaammi 2015-imeersumi pingaartumik ukiuni kingullerni inuiaqatigiit agguataarnerisa ineriartornerat sammineqarpoq. Ineriartornermi ilaatigut utoqqaat amerliartortut takutinneqarpoq. Tassunga saakkiartorneq aammalu innuttaasut katitigaanerini saakkiartorfiit allat ineqarnermi pisariaqartitsinermut sunniuteqarput. Tamanna ilaatigut sumiiffiit ilaanni inissianik inoqanngitsunik peqarneratigut, sumiiffiillu ilaanni inissianik amigaateqartoqarneratigut, tamatumalu kingunerisaanik inissianik utaqqisut amerlanerunerisigut ersarinnerpaamik takuneqarsinnaavoq.

Taamaammat siunissami illulioriaasissat pilersaarusiornerni innuttaasut katitigaaneranni allanngortoqarnissaata eqqarsaatigineqartarnissaa pillugu Naalakkersuisut siunnersuuteqartoq isumaqatigilluinnarpaat.

Aamma Naalakkersuisut arlalinnik, sanaartugassat pilersaarusiornernisa aningaasaqarnermullu pilersaarusiornernit akornanni ataqatigiissaarinerup pitsaanerulerneranik ataqatigiissitsinerulernermillu kinguneqartussanik suliniuteqartut Nuna Tamakkerlugu Pilersaarusiarnut Nassuiaammi atuarneqarsinnaavoq. Suliart inernerisa ilaattut pisortat ataatsimut suliassaqaarfiini arlalinni immikkoortunut pilersaarusiortoqassaaq. Sanaartornermi immikkoortumut pilersaarummik, ukiuni qulini ingerlaannartumik atuuttussamik suliartaqtoqarnissaa anguniakkat ilagaat

Tamanna tunngavigalugu ilisimatitsissutigineqarsinnaavoq, Ineqarnermut, Sanaartornermut Attaveqaqatigiinnermullu Naalakkersuisoqarfiup immikkoortumut pilersaarusiornermut atatillugu Namminersorlutik Oqartussat inissiaataannut attartortittakkanut pilersaarut piariingajalermagu.

Ineqarnermik pilersaarusiarni suliarpassuarnut ilagitillugu, sumiiffinni pineqartuni inuiaqatigiit agguataarnerini ineriartornermut sanilliullugu nutaanik inissialiortiternerup, taamatullu inissiat iluarsaanneqartut amerlassusaasa pisariaqartitsinermut naleqqunnissaat aallaavigineqarpoq. Ineqarnermut pilersaarut illoqarfinni ataasiakkaani inissiat inoqanngitsut qinerneqarsinnaasut piunnaqassutsimut naapertuuttunngortinniarlugit suliniuteqarfissani paasissutissiiviusumik tunngaveqarluni pilersaarusiornissamut tulleriiarinissamullu sakkusaqartitsilerpoq. Tamatumani iluarsaassinissaq, isaterinissaq nutaanilluunniit sanaartornissaq, aammalu inissiat amerlassusaasa angissusaannullu agguagaaneri qanoq isikkoqassanersut pineqaraluarpataluunniit tamanna atuuppoq.

Allatut oqaatigalugu inissiat utoqqarnut amerliartuinnartunut naatsorsuussat, sumi aamma qanoq amerlatigisut pissarsiarineqartariaqarnersut pilersaarusiussallugu ajornarunnaassaaq.

Maannarpiaq Namminersorlutik Oqartussat inissiaataasa attartortittakkat kommuninut tunniunneqarnissaat anguniarlugu sulisoqarpoq. Isuma tunngaviusoq tassaavoq, najukkami, kommunip piginnittuulerfiani tunniusimaneq aqputigalugu najugaqarfiit ataasiakkaat aningaasaqarnerisa annertuumik pitsanngortinneqarnissaat. Kommunip – taamaalillunilu najugaqartut – sunniuteqarsinnaanerini immikkoortumut pilersaarut aallartinneqartoq ilaatillugu suliaqartarnerisa iluaqutissanik amerlasuunik nassataqarnissaa naatsorsuutigineqarpoq. Pingaartumik inissianik sanaartornerit, iluarsaassinerit isaterinerilluunniit pisariaqartitsinermut annertunerujussuarmik naleqqunnissaat isiginiarneqarnerusalissaaq.

Naggasiutigalugu ilisimatitsissutigineqarsinnaavoq Ineqarnermut, Sanaartornermut Attaveqatigiinnermullu Naalakkersuisoqarfik inissialiortiternerit nutaanerusut ilaanni – inissiatut tamatigoortutut taaneqartuni – aaqqiissutissanik ineriartortitsisimammat, sanaartukkanik kinguaariinnit tamanit, ilaqutariinnit inuusuttuniit utoqqarnut kisermaanut atorineqarsinnaasunik ilusilersuisimalluni. Siunissami pisortat inissialiortiternerini inissiat eqaatsumik ilusilerneqartarnissaat, taamaalillunilu piffissap ingerlanerani najugaqariaaseqarnermi allanngorartumi pisariaqartitanut allanngorartunut naammassinniffiunissaat annertunerusumik pingaartinneqartassaaq. Tunngavissaq tamanna assersuutigalugu aamma ilinniartunut inissianik nutaanerusunik siunissamilu sananeqartussanik pilersaarusiortarnermut atorineqassaaq.

Aammattaaq ilassutigalugu oqaatigineqarsinnaavoq, 2016-imut aningaasanut inatsimmi Nuummi inissianut taartissanik 77-inik ulluunerani ornittakkamik ilaqartinneqartunik pilersaarusiornermut aningaasanik immikkoortitsisoqarmat. Taamaalilluni inissiani siunertat assigiinngitsorpasuit naammassineqassapput, taakkununga utoqqarnut inissiat ilaallutik. Sanaartorneq inissiarsuarnik pisoqqanik isateriaannarnillu isaterinissamut atatillugu illoqarfimmik nutarnerinertut isigineqassaaq.

Paasineqarsinnaasutut pisortat inissialiortiterneranni pilersaarut, utoqqaat amerliartuinnartut pisariaqartitaannut naammassinniffiusussaq ujjartorneqartoq Naalakkersuisut suliaralugu aallartereerpaat. Taamaattumik nassuiaammik allamik, aalajangiiffigisassatut siunnersuut malillugu AC-fuldmægtigimut ataatsimut ukiumut suliffiusussamut 500.000 koruunit missaannik akeqartussamik suliaqaqqittoqarnissaa pisariaqartinneqarpiarnersoq apeqqutaavoq?

Taamatut oqaaseqarlunga Naalakkersuisut sinnerlugit siunnersuut Inatsisartuni itigartinneqassasoq innersuuppara.